

Najib: Ketepatan mesti jadi panduan wartawan tulen
Malaysiakini.com
July 5, 2011

Ketepatan mesti menjadi cahaya panduan bagi wartawan tulen sekalipun internet menawarkan peluang begitu luas untuk komunikasi dan perkongsian maklumat, kata Perdana Menteri Datuk Seri Najib Razak.

Beliau berkata walaupun dengan internet kini semakin mudah menyalurkan segera sesuatu berita, ia juga semakin memudahkan pembaca mengetahui sama ada seseorang wartawan itu menghasilkan berita yang betul.

"Ini membolehkan mereka berkerjasama meneliti fakta, menganalisis dakwaan dan memutuskan sendiri tentang kebenaran sesuatu perkara.

"Dan sebaik saja pembaca anda memutuskan bahawa pemberitaan anda tidak tepat dan tidak boleh dipercayai, anda akan dapati dengan begitu cepat mereka terus berhenti membaca berita anda," kata beliau pada majlis Anugerah Kelab Wartawan Kebangsaan (NPC)-Naza 2011 di Kuala Lumpur malam ini.

Turut hadir isteri beliau Datin Seri Rosmah Mansor, bekas Presiden NPC Datuk Ahiruddin Atan, presiden NPC yang baru dipilih Mokhtar Hussein yang juga Pengarang Berita Perkhidmatan Berita Am Bernama, dan Pengerusi Eksekutif Kumpulan Bersama yang juga Ketua Pegawai Eksekutif Kumpulan Syarikat Naza, SM Nasarudin SM Nasimuddin.

Najib berkata aduan mengenai ketepatan media bukan baru tetapi kemajuan dalam bidang teknologi berertiimbangan antara mendapatkannya dengan pantas dan menentukan ia betul, satu tekanan yang telah wujud sekian lama dalam bidangewartawanan, semakin beranjak ke arah kepantasan daripada ketepatan.

Beliau berkata pada masa lalu, logistik pengeluaran dan pengedaran akhbar memberi masa kepada pemberita berfikir dengan hati-hati dan memastikan hujahan mereka sebelum menulis berita.

"Hari ini, dengan berjuta-juta rakyat Malaysia menggunakan Twitter, adalah berkemungkinan bagi berita tersebar dari Perlis ke Pontian dalam masa lebih sedikit daripada menaip 140 huruf ke dalam sebuah iPhone atau BlackBerry.

"Dan pada era di mana kebenaran ditakrifkan oleh suntingan terbaru ke dalam Wikipedia sebuah berita yang tidak tepat boleh membawa kesan, pengaruhnya kekal di ceruk gelap alam siber lama selepas fakta sudah menjelma," kata beliau.

Najib berkata media dunia boleh mengambil beberapa pelajaran daripada wartawan Malaysia yang berbeza daripada mereka kerana media Malaysia lebih sensitif dan bertimbang rasa.